

**VENDIM**  
**Nr. 236, datë 17.4.2024**

**PËR PËRCAKTIMIN E PROCEDURAVE, KUSHTEVE, KRITEREVE, AFATEVE,  
VLEFSHMËRISË DHE FORMATEVE PËR DHËNIEN, SHFUQIZIMIN DHE  
PEZULLIMIN E AUTORIZIMEVE PËR KRYERJEN E VEPRIMTARISË SË  
MAGAZINIMIT, TRANSFERIMIT DHE ASGJËSIMIT TË ARTIKUJVE  
PIROTEKNIKË**

Në mbështetje të nenit 100 të Kushtetutës dhe të neneve 24, pika 2, e 25, pika 1, të ligjit nr. 73/2021, “Për hedhjen në treg dhe mbikëqyrjen e artikujve piroteknikë”, me propozimin e ministrit të Brendshëm, Këshilli i Ministrave

VENDOSI:

**KREU I**  
**OBJEKTI, STRUKTURA PËRGJEGJËSE, KUSHTET DHE KRITERET PËR PAJISJEN  
ME AUTORIZIM PËR MAGAZINIMIN, ASGJËSIMIN DHE TRANSFERIMIN E  
ARTIKUJVE PIROTEKNIKË**

Neni 1  
**Objekti**

Ky vendim përcakton procedurat, kushtet, kriteret, afatet, vlefshmërinë dhe formatet për dhënien, shfuqizimin dhe pezullimin e autorizimeve për kryerjen e veprimtarisë së magazinimit, transferimit dhe asgjësimit të artikujve piroteknikë.

Neni 2  
**Struktura përgjegjëse për dhënien e autorizimit për magazinimin, transferimin dhe  
asgjësimin e artikujve piroteknikë**

Komisariati i policisë është struktura përgjegjëse për dhënien e autorizimit për kryerjen e veprimtarisë së transferimit, magazinimit dhe asgjësimit të artikujve piroteknikë.

Neni 3  
**Kushtet dhe kriteret e pajisjes me autorizim për magazinimin, transferimin dhe  
asgjësimin e artikujve piroteknikë**

1. Operatori ekonomik, që kërkon të pajiset me autorizim për kryerjen e veprimtarisë për magazinimin e artikujve piroteknikë, duhet të plotësojë kushtet e mëposhtme:

- a) të jetë i regjistruar si subjekt tregtar në Republikën e Shqipërisë, sipas legjislacionit në fuqi;
- b) të ketë në pronësi apo në përdorim objektin për magazinimin, sipas një kontrate qiraje/nënqiraje ose hua përdorimi, të njëzuar nga noteri;
- c) të ketë projektin për magazinën, si dhe vërtetimin për kolaudimin e objektit, të lëshuar nga organi përgjegjës, që mbulon çështjet e infrastrukturës dhe energjetikës;
- ç) të ketë dëshminë e mbrojtjes nga zjarri dhe shpëtimi;
- d) të ketë kontraktuar një subjekt të shërbimit privat të sigurisë fizike për ruajtjen e magazinës;

dh) të sigurojë që ambienti i jashtëm dhe i brendshëm i magazinës të jetë i monitoruar me kamera, sipas kërkesave të ligjit për masat shtesë të sigurisë.

2. Operatori ekonomik, që kërkon të pajiset me autorizim për transferimin e artikujve piroteknikë duhet të plotësojë kushtet e mëposhtme:

a) të jetë i pajisur me licencën për import, eksport dhe prodhim të artikujve piroteknikë nga Autoriteti i Kontrollit Shtetëror të Eksporteve ose licencën e tregtimit, shitjes me pakicë, të lëshuar nga njësia administrative;

b) personi që do të shoqërojë artikujt piroteknikë gjatë transferimit të jetë i pajisur me dëshminë e zjarrmëtarit, lëshuar nga Agjencia Kombëtare për Sigurinë dhe Emergjencat në Miniera;

c) të ketë në pronësi apo në përdorim objekt për magazinimin e artikujve piroteknikë, të miratuar sipas këtij vendimi, si dhe të vërtetojë se edhe operatori ekonomik që pret mallin të ketë në pronësi apo në përdorim objekt për magazinimin e artikujve piroteknikë, të miratuar sipas këtij vendimi, ose të jetë dyqan i shitjes me pakicë, i licencuar nga njësia administrative që mbulon territorin;

ç) të vërtetojë se drejtuesi i automjetit, që kryen transportin, të jetë i pajisur me certifikatë “ADR”, sipas legjislacionit në fuqi për transportin e lëndëve të rrezikshme;

d) të vërtetojë se automjeti, që kryen transportin, të jetë i pajisur me certifikatë “ADR”, sipas legjislacionit në fuqi për transportin e lëndëve të rrezikshme dhe me GPS funksional për kontrollin dhe dokumentimin e itinerarit në subjektin që bën transferimin;

dh) të ketë vërtetimin dhe aktin e kontrollit nga Shërbimi Vendor i Mbrojtjes nga Zjarri dhe Shpëtimin se automjeti që kryen transportin është i pajisur me shenjat konvencionale treguese për transport të këtyre artikujve, si dhe fikse zjarri jo më të vogla se 6 (gjashtë) kg dhe jo më pak se 2 (dy) copë;

e) rastet kur transferimi i mallit do të kryhet nga transportuesit e huaj me mjetet e tyre të transportit, të pajisur me certifikatë “ADR” në vendet e origjinës, si dhe rastet e transitivit të këtyre mallrave nëpërmjet territorit të Republikës së Shqipërisë përjashtohen nga shkronja “dh”, e pikës 2, të këtij kreu;

ë) të ketë të deklaruar origjinën e mallit.

3. Pajisja me autorizim për asgjësimin e artikujve piroteknikë rregullon procedurën për lejimin e grumbullimi dhe asgjësimit të artikujve piroteknikë.

3.1 Operatori ekonomik, që kërkon të pajiset me autorizim për kryerjen e procedurës së asgjësimit të artikujve piroteknikë, duhet të plotësojë kushtet e mëposhtme:

a) të ketë licencë për prodhim, import, eksport apo autorizimin për transitim të artikujve piroteknikë, të lëshuar nga Autoriteti i Kontrollit Shtetëror të Eksporteve ose licencën e tregtimit, shitjes me pakicë të lëshuar nga njësia administrative;

b) të ketë një marrëveshje me subjektet e licencuara nga Ministria e Mbrojtjes, të cilat ofrojnë edhe shërbimin e shkatërrimit/çmilitarizimit të lëndëve plasëse dhe municioneve ose marrëveshje me operatorin e licencuar për asgjësimin e artikujve piroteknikë, në përputhje me legjislacionin në fuqi për menaxhimin e mbetjeve të integruara;

c) të deklarojë sasinë, llojin, origjinën dhe arsyet e asgjësimit të artikujve piroteknikë.

## KREU II

### PROCEDURAT, AFATET, VLEFSHMËRTITË DHE FORMATET PËR KËRKESËN DHE DHËNIEN E AUTORIZIMEVE PËR MAGAZINIMIN, TRANSFERIMIN DHE ASGJËSIMIN E ARTIKUJVE PIROTEKNIKË

#### Neni 4

### **Kërkesa për pajisjen me autorizim**

1. Operatori ekonomik bën kërkesën për pajisje me autorizimin përkatës në portalin “*e-Albania*.”
2. Operatori ekonomik pajiset elektronikisht te “Hapësira ime”, në portalin “*e-Albania*”, me dokumentin e autorizimit të lëshuar me vulë elektronike ose nënshkrim elektronik nga institucioni shërbimofrues.

#### Neni 5

### **Formati për kërkesën për pajisjen me autorizim, për magazinimin e artikujve piroteknikë**

1. Kërkesa për marrjen e autorizimit për magazinimin e artikujve piroteknikë përmban:
  - a) emrin e operatorit ekonomik;
  - b) adresën e selisë së operatorit ekonomik;
  - c) të dhënat personale për administratorin dhe punonjësit, të cilët do të kryejnë veprimtari me artikujt piroteknikë. Të dhënat përfshijnë (emër, mbiemër, numër identifikimi, si dhe pozicionin e punës);
  - ç) adresën e vendndodhjes së magazinës;
  - d) llojin e artikujve piroteknikë, sipas kategorive të përcaktuara në ligj, si dhe kapacitetin maksimal të magazinës;
  - dh) afatin e përdorimit të magazinës, i përcaktuar nga komisarati i policisë ku ndodhet magazina.
2. Së bashku me kërkesën për lëshimin e autorizimit për magazinimin e artikujve piroteknikë, operatori ekonomik ngarkon në portalin “*e-Albania*” edhe këto dokumente shoqëruese:
  - a) fotokopjen e dokumentit të pronësisë të noterizuar, nëse është pronë e subjektit ose dokumentin që vërteton të drejtën e përdorimit, nëse objekti i magazinimit është në pronësi të një të treti;
  - b) vërtetimin nga komisarati i policisë përkatës, ku përcaktohet se objekti i plotëson kushtet për magazinimin e artikujve piroteknikë, sipas përcaktimeve në rregulloren e teknikës së sigurimit për përdorimin civil të lëndëve plasëse në Republikën e Shqipërisë;
  - c) certifikatën e mbrojtjes nga zjarri, lëshuar nga Shërbimi i Mbrojtjes nga Zjarri dhe Shpëtimin.

#### Neni 6

### **Kërkesa për pajisjen me autorizim për transferimin e artikujve piroteknikë**

1. Kërkesa për marrjen e autorizimit, për transferimin e artikujve piroteknikë, për përdorim civil përmban:
  - a) emrin e operatorit ekonomik;
  - b) adresën e selisë së operatorit ekonomik;
  - c) të dhënat për administratorin;
  - ç) adresën e vendndodhjes së magazinës dalëse dhe të magazinës pritëse;
  - d) itinerarin e lëvizjes;
  - dh) llojin, sasinë dhe fuqinë e artikujve piroteknikë që do të transferohen;
  - e) deklarin e origjinës së mallit (të artikujve piroteknikë);
  - ë) të dhënat e automjetit që do të kryejë transferimin;
  - f) të dhënat e drejtuesit të mjetit;
  - g) të dhënat e shoqëruesit të pajisur me dëshminë e zjarrmëtarit;
  - gj) të dhënat e punonjësit të shërbimit privat të sigurisë fizike.

2. Së bashku me kërkesën për lëshimin e autorizimit për transferimin e artikujve piroteknikë, operatori ekonomik duhet të ngarkojë në sistem edhe këto dokumente shoqëruese:

a) Kopje të licencës për import, eksport apo prodhim të artikujve piroteknikë, lëshuar nga Autoriteti i Kontrollit Shtetëror të Eksporteve ose licencën e tregtimit, shitjes me pakicë, të lëshuar nga njësi administrative;

b) Fotokopjen e dëshmisë së zjarrmëtarit, lëshuar nga organi përgjegjës që mbulon çështjet e infrastrukturës dhe energjetikës;

c) Certifikatën “ADR” të drejtuesit të mjetit, të lëshuar sipas legjislacionit në fuqi për transportin e lëndëve të rrezikshme;

ç) Certifikatën “ADR” të automjetit, të lëshuar sipas legjislacionit në fuqi për transportin e lëndëve të rrezikshme;

d) Kopje të kontratës me shërbimin privat të sigurisë fizike që kryen ruajtjen dhe sigurimin e automjetit;

dh) Vërtetimin dhe aktin e kontrollit, lëshuar nga Shërbimi Vendor i Mbrojtjes nga Zjarri dhe Shpëtimin për sinjalistikën e automjetit që do të kryejë transferimin;

e) Deklaratën e origjinës së mallit (të artikujve piroteknikë);

ë) Kopje të licencës të kategorisë III.2.B.

#### Neni 7

### **Kërkesa për pajisjen me autorizimin për asgjësimin e artikujve piroteknikë**

1. Kërkesa për marrjen e autorizimit për asgjësimin e artikujve piroteknikë përmban:

a) të dhënat për administratorin e operatorit ekonomik;

b) vendin ku do të kryhet asgjësimi;

c) sasinë dhe llojin e artikujve piroteknikë që do të asgjësohen;

ç) datën dhe orën në të cilën do të kryhet asgjësimi.

2. Së bashku me kërkesën për lëshimin e autorizimit për asgjësimin e artikujve piroteknikë, operatori ekonomik duhet të ngarkojë në portalin “e-Albania” këto dokumente shoqëruese:

a) Marrëveshjen e lidhur me subjektet e licencuara nga Ministria e Mbrojtjes, të cilat ofrojnë edhe shërbimin e asgjësimit të lëndëve plasëse ose marrëveshjen e lidhur me operatorin ekonomik të licencuar për asgjësimin e artikujve piroteknikë, në përputhje me legjislacionin në fuqi për menaxhimin e mbetjeve të integruara;

b) Deklaratën e origjinës së mallit (artikujve piroteknikë);

c) Kopje të licencës për prodhim, import, eksport, të artikujve piroteknikë, të lëshuar nga Autoriteti i Kontrollit Shtetëror të Eksporteve ose kopje të lejes së tregtimit, shitjes me pakicë, të lëshuar nga njësi administrative;

ç) Kopje të lejes mjedisore.

#### Neni 8

### **Verifikimi i dokumenteve dhe formatet e autorizimeve**

1. Për pranimin, verifikimin dhe shqyrtimin e dokumenteve për autorizim, struktura përgjegjëse ndjek këtë procedurë:

a) Verifikon dokumentacionin e dërguar nga operatori ekonomik, si dhe plotëson formularët përkatës, sipas rubrikave;

b) Verifikon besueshmërinë e kërkesit, si dhe përgatit dokumentin e besueshmërisë dhe të përshtatshmërisë së personit, brenda 5 (pesë) ditëve.

2. Format i kërkesës për pajisjen me autorizim dhe formati i autorizimit për magazinimin, transferimin dhe asgjësimin e artikujve piroteknikë janë sipas lidhjeve që i bashkëlidhen vendimit dhe janë pjesë përbërëse të tij.

Neni 9

### **Afati i shqyrtimit të kërkesës për pajisjen me autorizim**

Afati për shqyrtimin e kërkesës për pajisjen me autorizim është:

a) 15 (pesëmbëdhjetë) ditë nga dita e paraqitjes së kërkesës për pajisjen me autorizim për magazinim;

b) 15 (pesëmbëdhjetë) ditë nga dita e paraqitjes së kërkesës për pajisjen me autorizim për transferim;

c) 10 (dhjetë) ditë nga dita e paraqitjes së kërkesës për pajisjen me autorizim për asgjësim.

Neni 10

### **Procedura e shqyrtimit, dhënies së autorizimit apo mospranimit të kërkesës për pajisjen me autorizim**

1. Struktura përgjegjëse për dhënien e autorizimit, në rastet kur konstaton mangësi në paraqitjen e kërkesës apo mungesë të dokumentacionit, njofton operatorin ekonomik për plotësimin e tyre.

2. Operatori ekonomik brenda 10 (dhjetë) ditëve duhet të plotësojë mangësitë e konstatuara. Në këtë rast, afati i shqyrtimit pezullohet deri në plotësimin e mangësive të kërkesës nga ana e operatorit ekonomik.

3. Kërkesa për pajisjen me autorizim nuk pranohet nëse operatori ekonomik nuk plotëson mangësitë e dokumentacionit brenda afatit 10-ditor.

4. Në rastet kur struktura përgjegjëse miraton kërkesën për dhënien e autorizimit, vendimi i miratimit të kërkesës i dërgohet operatorit ekonomik në të njëjtën adresë dhe me të njëjtat mjete që ka aplikuar. Format i autorizimit të lëshuar verifikohet në çdo rast kontrolli nga strukturat përgjegjëse, të përcaktuara në ligjin për lëndët plasëse për përdorim civil.

5. Në rastet e transferimit të herëpashershëm, struktura përgjegjëse kthen përgjigje për dhënie të autorizimit apo mospranim të kërkesës për autorizim për operatorin ekonomik me të njëjtat mjete, brenda të njëjtut afat që është bërë njoftimi nga operatori ekonomik.

6. Vendimi për mospranimin e kërkesës mund të ankimohet sipas procedurave të përcaktuara në Kodin e Procedurave Administrative.

Neni 11

### **Procedura e shfuqizimit dhe pezullimit të autorizimit**

1. Përveç rasteve të përcaktuara në ligjin për artikujt piroteknikë dhe në ligjin për licencat, autorizimet dhe lejet, autorizimi për magazinimin, transferimin dhe asgjësimin e artikujt piroteknikë shfuqizohet edhe në rastet kur operatori ekonomik është në tejkalim, ka shkelur apo nuk përmbush më kriteret dhe kushtet e përcaktuara në këtë vendim.

2. Struktura përgjegjëse, në rastet kur gjatë verifikimit të veprimtarisë së operatorit ekonomik gjen shkelje të kushteve të përcaktuara në autorizim, pezullon autorizimin deri në verifikimin e rrethanave.

3. Struktura përgjegjëse kthen përgjigje më të njëjtat mënyra që është dërguar kërkesa për shfuqizimin e autorizimit, duke nxjerrë një vendim të arsyetuar.

4. Vendimi për shfuqizimin apo pezullimin e autorizimit mund të ankimohet sipas procedurave të përcaktuara në Kodin e Procedurave Administrative.

#### Neni 12

#### **Vlefshmëria e autorizimit**

1. Afati i vlefshmërisë së autorizimit për magazinim është deri në 2 (dy) vjet për objekte magazinimi të përkohshme dhe deri në 6 (gjashtë) muaj për objekte magazinimi javore apo ditore.

2. Për transferimet për çdo ngarkesë dhe çdo mjet që bën transportin e ngarkesës, afati i autorizimit për transferim është sa koha e kërkuar për transferimin.

3. Afati i autorizimit për asgjësim është i vlefshëm deri në 30 (tridhjetë) ditë.

4. Me mbarimin e afatit të vlefshmërisë së autorizimit, subjekti i interesuar për t'u pajisur sërish me këtë autorizim duhet të paraqesë kërkesën dhe dokumentacionin që provon përmbushjen e kushteve të autorizimit.

#### KREU III

#### Neni 13

#### **Dispozita të fundit**

Ngarkohen Ministria e Brendshme, Ministria e Mbrojtjes, Agjencia Kombëtare për Sigurinë dhe Emergjencat në Miniera (AKSEM), Policia e Shtetit dhe Shërbimi i Mbrojtjes nga Zjarri dhe Shpëtimin për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR  
**Edi Rama**



REPUBLIKA E SHQIPËRISË  
MINISTRIA E BRENDSHME  
DREJTORIA E PËRGJITHSHME E POLICISË SË SHTETIT  
DREJTORIA VENDORE E POLICISË \_\_\_\_\_  
KOMISARIATI I POLICISË \_\_\_\_\_

**A U T O R I Z I M**

**Për asgjësimin e artikujve piroteknikë**

Bazuar në kërkesën nr. \_\_\_\_\_ datë \_\_\_\_\_ të subjektit \_\_\_\_\_ pajisur nga Ministria e Mbrojtjes/Ministria e Infrastrukturës dhe Energjisë me licencë/autorizim nr. \_\_\_\_\_ datë \_\_\_\_\_, me administrator z. \_\_\_\_\_ dhe drejtues teknik z. \_\_\_\_\_, me seli në \_\_\_\_\_, me adresë të magazinës \_\_\_\_\_, pas verifikimeve të kryera nga struktura e rendit të Komisarariatit të Policisë \_\_\_\_\_ u konstatua se;

Ky subjekt ushtron aktivitetin për prodhimin/import/eksport/përdorimin e artikujve piroteknikë në qytetin \_\_\_\_\_, i cili është në juridiksionin e Komisarariatit të Policisë \_\_\_\_\_ dhe ka deklaruar se në magazinën e artikujve piroteknikë ka një sasi \_\_\_\_\_ artikuj piroteknikë të skaduar, të cilat duhet asgjësuar.

Subjekti ka lidhur marrëveshje me subjektin e licencuar nga Ministria e Mbrojtjes për asgjësimin e artikujve piroteknikë të skaduar, i cili ofron këtë shërbimin në ambientin e caktuar nga subjekti i licencuar .

Shoqërimi i artikujve piroteknikë të skaduar do të kryhet nga shtetasi \_\_\_\_\_ i pajisur me dëshminë e zjarrmëtarit nr. \_\_\_\_\_ datë \_\_\_\_\_.

Subjekti ka në pronësi/qira automjet tip \_\_\_\_\_ me targa \_\_\_\_\_ për transportin e artikujve piroteknikë të skaduar, i cili plotëson kushtet e mbrojtjes nga zjarri dhe është pajisur me mjetet e nevojshme.

Subjekti ka lidhur kontratë me subjektin e SHPSF \_\_\_\_\_/Policinë e Shtetit për shoqërimin e automjetit që do të kryejë transportin e artikujve piroteknikë të skaduar.

Subjekti \_\_\_\_\_ autorizohet të asgjësojë artikuj piroteknikë si më poshtë;

1. Artikuj piroteknikë \_\_\_\_\_ ton.  
Afati i autorizimit është data \_\_\_\_\_

**SHEFI I KOMISARIATIT**



REPUBLIKA E SHQIPËRISË  
MINISTRIA E BRENDSHME  
DREJTORIA E PËRGJITHSHME E POLICISË SË SHTETIT  
DREJTORIA VENDORE E POLICISË \_\_\_\_\_  
KOMISARIATI I POLICISË \_\_\_\_\_

**AUTORIZIM**

**Për magazinim të artikujve piroteknikë**

Bazuar në kërkesën nr. \_\_\_\_\_ datë \_\_\_\_\_ të subjektit \_\_\_\_\_ pajisur nga Ministria e Mbrojtjes/Ministria e Infrastrukturës dhe Energjisë me licencë/autorizim nr. \_\_\_\_\_ datë \_\_\_\_\_, me administrator z. \_\_\_\_\_ dhe drejtues atë z. \_\_\_\_\_, me seli në \_\_\_\_\_, me adresë të magazinës \_\_\_\_\_, pas verifikimeve të kryera nga struktura e Rendit të Komisarariatit të Policisë \_\_\_\_\_ u konstatua se;

Ky subjekt ushtron aktivitetin për prodhimin/import/eksport/përdorimin të artikujve piroteknikë në qytetin \_\_\_\_\_, i cili është në juridiksionin e Komisarariatit të Policisë \_\_\_\_\_.

Subjekti plotëson kërkesat dhe është pajisur me vërtetimin e kolaudit nga organi përgjegjës i Ministrisë së Industrisë dhe Energjetikës nr. \_\_\_\_\_ datë \_\_\_\_\_ dhe atë ne plotëson kushtet e mbrojtjes nga zjarri, pajisur me aktin nr. \_\_\_\_\_ datë \_\_\_\_\_.

Magazina është e pajisur me kamera sigurie në bazë të kërkesave të ligjit “Për masat shtesë të sigurisë” dhe për ruajtjen dhe sigurinë e saj subjekti ka lidhur kontratë me subjektin e SHPSF \_\_\_\_\_.

Subjekti autorizohet të magazinojë artikuj piroteknikë sipas kapacitetit të magazinës, si më poshtë:

1. Artikuj piroteknikë \_\_\_\_\_ ton.
  2. \_\_\_\_\_
- Afati i autorizimit është nga data \_\_\_\_\_ deri më datë \_\_\_\_\_.

**SHEFI KOMISARIATIT**



REPUBLIKA E SHQIPËRISË  
MINISTRIA E BRENDSHME  
DREJTORIA E PËRGJITHSHME E POLICISË SË SHTETIT  
DREJTORIA VENDORE E POLICISË \_\_\_\_\_  
KOMISARIATI I POLICISË \_\_\_\_\_

**AUTORIZIM**

**Për transferimin e artikujve piroteknikë**

Bazuar në kërkesën nr. \_\_\_\_\_ datë \_\_\_\_\_ të subjektit \_\_\_\_\_, pajisur nga Ministria e Mbrojtjes/Ministria e Infrastrukturës dhe Energjisë me licencë/autorizim nr. \_\_\_\_\_ datë \_\_\_\_\_, me administrator z. \_\_\_\_\_ dhe drejtues teknik z. \_\_\_\_\_, me seli në \_\_\_\_\_, me adresë të magazinës \_\_\_\_\_, pas verifikimeve të kryera nga struktura e Rendit të Komisarariatit të Policisë \_\_\_\_\_ u konstatua se;

Ky subjekt ushtron aktivitetin për prodhimin/import/eksport/përdorimin të artikujve piroteknikë në qytetin \_\_\_\_\_, i cili është në juridiksionin e Komisarariatit të Policisë \_\_\_\_\_,

Subjekti është pajisur me autorizim për magazinim të artikujve piroteknikë nr. \_\_\_\_\_ datë \_\_\_\_\_ dhe subjekti pritës i mallit është pajisur me autorizim për magazinim të artikujve piroteknikë \_\_\_\_\_ datë \_\_\_\_\_.

Transferimi i artikujve piroteknikë do të kryhet me automjetin tip \_\_\_\_\_ me targa \_\_\_\_\_ dhe drejtuesi i mjetit \_\_\_\_\_ të cilët janë të pajisur me certifikatë ADR nr. \_\_\_\_\_ datë \_\_\_\_\_, plotësojnë kushtet e mbrojtjes nga zjarri dhe mjeti është i pajisur me mjetet mbrojtëse të nevojshme.

Shoqërimi i artikujve piroteknikë do të kryhet nga shtetasi \_\_\_\_\_ i pajisur me dëshminë e zjarrmëtarit nr. \_\_\_\_\_ datë \_\_\_\_\_ si dhe nga punonjësi i SHPSF/Policia e Shtetit \_\_\_\_\_ sipas kontratës.

Subjekti autorizohet të transferojë artikuj piroteknikë, si më poshtë;

1. Artikuj piroteknikë \_\_\_\_\_ ton.
2. \_\_\_\_\_

Afati i autorizimit është data \_\_\_\_\_

**SHEFI I KOMISARIATIT**

**KËRKESË**  
**Për pajisjen me autorizim për asgjësim të artikujve piroteknikë**

Drejtuar: Komisarariatit të Policisë\_\_\_\_\_.

Unë \_\_\_\_\_administrator i subjektit \_\_\_\_\_i pajisur nga Ministria e Mbrojtjes/Ministria e Infrastrukturës dhe Energjisë me licencë/autorizim nr.\_\_\_\_\_. “Për import/eksport/prodhim/përdorim të artikujve piroteknikë”, me adresë të selisë\_\_\_\_\_, me drejtues teknik \_\_\_\_\_, me adresë të magazinës\_\_\_\_\_, paraqes kërkesën si më poshtë:

Ushtoj aktivitetin për prodhimin/import/eksport/përdorimin të artikujve piroteknikë në qytetin\_\_\_\_\_i cili është në juridiksionin e Komisarariatit të Policisë\_\_\_\_\_.

Kam në pronësi/qira një magazinë në \_\_\_\_\_për të cilën jam pajisur nga Policia e Shtetit me autorizim nr.\_\_\_\_\_datë \_\_\_\_\_për magazinimin e artikujve piroteknikë, me afat deri me \_\_\_\_\_

Në magazinë kam një sasi\_\_\_\_\_artikujve piroteknikë e cila është e skaduar, është jashtë përdorimit dhe duhet asgjësuar.

Kam lidhur marrëveshje me subjektin e licencuar nga Ministria e Mbrojtjes i cili ofron shërbimin e asgjësimit të artikujve piroteknikë. Asgjësimi do të kryhet në ambientin e caktuar nga subjekti i licencuar nga Ministria e Mbrojtjes për asgjësimin e artikujve piroteknikë të skaduar .

Shoqërimi i artikujve piroteknikë të skaduar do të kryhet nga shtetasi \_\_\_\_\_ i pajisur me dëshminë e zjarrmëtarit nr.\_\_\_\_\_datë\_\_\_\_\_.

Subjekti ka në pronësi/qira automjet tip \_\_\_\_\_me targa \_\_\_\_\_për transportin e artikujve piroteknikë të skaduar i cili plotëson kushtet e mbrojtjes nga zjarri dhe është pajisur me mjetet mbrojtëse përkatëse.

Subjekti ka lidhur kontratë me subjektin e SHPSF \_\_\_\_\_/Policinë e Shtetit për shoqërimin e automjetit që do të kryejë transportin e artikujve piroteknike të skaduar.

Sa sipër, kërkoj të pajisem me autorizim për asgjësimin e artikujve piroteknikë të skaduar.

Bashkëlidhur, me kërkesën dorëzohen dokumentet që vërtetojnë plotësimin e kriterëve për asgjësimin e artikujve piroteknikë.

**KËRKUESI**

**KËRKESË**  
**Për pajisjen me autorizim për magazinim të artikujve piroteknikë**

Drejtuar: Komisariatit të Policisë\_\_\_\_\_.

Unë \_\_\_\_\_administrator i subjektit \_\_\_\_\_i pajisur nga Ministria e Mbrojtjes/ Ministria e Infrastrukturës dhe Energjisë me licencë/autorizim nr\_\_\_\_\_. “Për prodhim/import/eksport e përdorim të artikujve piroteknikë”, me adresë të selisë\_\_\_\_\_, me drejtues teknik \_\_\_\_\_, me adresë të magazinës\_\_\_\_\_, paraqes kërkesën si më poshtë,.

Ushtroj aktivitetin për prodhimin/import/eksport/përdorimin të artikujve piroteknikë në qytetin\_\_\_\_\_, i cili është në juridiksionin e Komisariatit të Policisë\_\_\_\_\_.

Kam në pronësi/qira një magazine në \_\_\_\_\_, në të cilën do të magazinohet artikuj piroteknikë të \_\_\_\_\_llojit\_\_\_\_\_, me sasi\_\_\_\_\_për një afat\_\_\_\_\_.

Magazina plotëson kërkesat dhe është pajisur me vërtetimin e kolaudit nga organi përgjegjës i Ministrisë së Industrisë dhe Energjetikës nr.\_\_\_\_datë \_\_\_\_\_dhe plotëson kushtet e mbrojtjes nga zjarri, për të cilën është pajisur me aktin nr.-\_\_\_\_datë\_\_\_\_\_.

Magazina ka një kapacitet magazinimi \_\_\_\_\_ton artikuj piroteknikë  
Magazina është e pajisur me kamera sigurie në bazë të kërkesave të ligjit “Për masat shpesh të sigurisë dhe për ruajtjen dhe sigurinë e saj është lidhur kontratë me subjektin e SHPSF\_\_\_\_\_.

Sa sipër, kërkoj të pajisem me autorizim për magazinimin e artikujve piroteknikë.

Bashkëlidhur, me kërkesën dorëzohen dokumentet që vërtetojnë plotësimin e kriterëve për magazinimin e artikujve piroteknikë.

**KËRKUESI**

**KËRKESË**  
**Për pajisjen me autorizim për transferim të artikujve piroteknikë**

Drejtuar; Komisarariatit të Policisë\_\_\_\_\_.

Unë \_\_\_\_\_ administrator i subjektit \_\_\_\_\_ i pajisur nga Ministria e Mbrotjtjes/ Ministria e Infrastrukturës dhe Energjisë me licencë/autorizim nr\_\_\_\_\_. “Për import/eksport/prodhim/përdorim të artikujve piroteknikë”, me adresë të selisë\_\_\_\_\_, me drejtues teknik \_\_\_\_\_, me adresë të magazinës\_\_\_\_\_, paraqes kërkesën si më poshtë,.

Ushtroj aktivitetin për prodhimin/import/eksport/përdorimin të artikujve piroteknikë në qytetin\_\_\_\_\_e cila është në juridiksionin e Komisarariatit të Policisë\_\_\_\_\_.

Kam në pronësi/qira një magazine në \_\_\_\_\_, për të cilën jam pajisur nga Policia e Shtetit me autorizim nr.\_\_\_\_\_datë \_\_\_\_\_ për magazinimin të artikujve piroteknikë me afat deri më \_\_\_\_\_ dhe subjekti që pret mallin është i licencuar për ushtrimin e aktivitetit me artikujt piroteknikë dhe pajisur nga Policia e Shtetit me autorizim nr.\_\_\_\_\_datë\_\_\_\_\_për magazinimin e artikujve piroteknikë, me afat deri me \_\_\_\_\_.

Transferimi i artikujve piroteknikë do të kryhet me automjetin tip \_\_\_\_\_me targa\_\_\_\_\_ dhe drejtues mjeti \_\_\_\_\_, të cilët janë të pajisur me certifikatë ADR nr.\_\_\_\_\_datë\_\_\_\_\_. Mjeti plotëson kushtet e mbrotjtjes nga zjarri dhe është i pajisur me mjetet mbrotjtëse të nevojshme.

Shoqërimi i artikujve piroteknikë do të kryhet nga shtetasi \_\_\_\_\_ i pajisur me dëshminë e zjarrmëtarit nr.\_\_\_\_\_datë\_\_\_\_\_, si dhe nga punonjësi i SHPSF/Policia e Shtetit \_\_\_\_\_sipas kontratës.

Subjekti ka lidhur kontratë me subjektin e SHPSF \_\_\_\_\_/Policinë e Shtetit për shoqërimin e automjetit që do të kryejë transferimin e artikujve piroteknikë.

Sa sipër, kërkoj të pajisem me autorizim për transferimin e artikujve piroteknikë.

Bashkëlidhur, me kërkesën dorëzohen dokumentet që vërtetojnë plotësimin e kriterëve për transferimin e artikujve piroteknikë.

**KËRKUESI**